



Kuvendi i Komunës Klinë

01Nr. 06-37221 2023

Klinë, dt. 31, 10, 2023

PROCESVERBAL

Nga mbledhja e Kuvendit të Komunës së Klinës mbajtur me datë 22. 09. 2023 në ora 10:00 në Sallën e Kuvendit të Komunës.

Mbledhjen e hapi kryesuesi I Kuvendit z. Fadil Gashi. Pjesëmarrës në mbledhje : Kryetari I Komunës, z. Zenun Elezaj, nënkryetarja, znj. Marqë Selmanaj, drejtorë të drejtorive, media, qytetarë.

z. Fadil Gashi, kryesues: Përshëndetje për të gjithë! Përshëndetje për ju anëtarë të Kuvendit, në emër të Kuvendit edhe timin përshëndes kryetarin e Komunës, drejtorë të drejtorive, Policinë e Kosovës, OSBE, Radio Alba, Klina Info, zyrtarë tjerë. Edhe një herë faleminderit për prezencë, me lejoni që para se me kaluar tek rendi i ditës, t`ju informoj që jemi prezentë njëzet e gjashtë anëtarë . Kam konfirmim që Blerta Gashi do të na bashkohet. Mund të procedojmë me mbledhjen e Kuvendit. Paraprakisht unë e kam konfirmimin tanimë nga Komisioni Qendror i Zgjedhjeve të nënshkruar për zëvendësimin e anëtarit të Kuvendit, Bledar Berisha me zotin Ilir Hoti. Iliri është këtu. Besoj që edhe shkresën e betimit e ka dhe e lus që të ngritët në këmbë dhe ta e lexoi betimin.

z. Ilir Hoti bënë betimin

Kryesuesi I kuvendit vazhdon duke thënë: “Besoi që anëtarët e kuvendit e kanë pranuar rendin e ditës. Bashkë me materialin, besoj që edhe sot e keni pranuar material në adresat e juaja zyrtare, kemi edhe dy kërkesa tjera që i kemi nga kryetari i Komunës shtesë në rend të ditës, njëra është miratimi i Nismës për të hyrë në bashkëpunim ndër komunale me komunën e Skenderajt dhe e dyta është miratimi i propozimit për dhënien shfrytëzim afatshkurtër, të lokaleve në pronësi të Komunës. Janë dy çështje pak më urgjente, është mirë që Kuvend me i proceduar.

Në lidhje me rendin e ditës fjalën e morri z. Zafer Gashi I cili tha se kërkesat tona duhet të trajtohen njëjtë si ajo e kryetarit. Ne me kohë e kemi dërguar, e kemi me kohë dhe nuk ka kurrfarë arsye që sot të mos të jenë në rend të ditës.

“ Unë edhe një herë po e sqaroi se kërkesat e kryetarit janë kërkesa urgjente dhe se kërkesat e juaja kanë ardhur pasi që e kemi shpërndarë ftesën dhe rendin e ditës, dhe asnjëra nuk e ka urgjencën për këtë seancë. Ato do të procedohen për seancën e radhës. “ – tha kryesuesi Gashi.

z. Zafer Gashi: Ju lutem, nëse është fjala për urgjencë, ne mendojmë që po aq urgjente janë edhe kërkesat tona. Ne po shohim që kanë ardhë materiale edhe pas dërgimit të rendit të ditës, ky rend i ditës është shtuar sipas kërkesave dhe materialeve të ndryshme prandaj kjo që thoni nuk qëndron.

z. Esat Raci: Përshëndetje kryesues! Përshëndetje për të gjithë të pranishmit! Unë kam dy çështje rreth rendit të ditës. A ka mundësi sot na jepet informacion, meqenëse ne e kemi info vetëm nëpërmes televizioneve publike dhe portaleve rreth fabrikës së Çimentos. Jemi të njoftuar, siç e thashë, nëpërmes portaleve që një vendim nga Gjykatat Themelore ka ardhë. Cilët janë hapat e më tutjemë të ekzekutivi? Çka do të bahet me lejet e dhëna? Çështja e dytë, në qoftë se s'gaboju në seancën e shkurtit apo të marsit, ne e kemi pranuar një kërkesë nga kategoritë e dalë nga lufta për një shumë të hollave. Vendimi ka qenë unanim, në qoftë se s'gaboju. Vendimi ka qenë unanim që me rishikim të buxhetit, të aprovohet kërkesa e kategorive të dalë nga lufta. Çka u bë me atë vendim, pse nuk u realizua?

z. Fadil Gashi, kryesues: Ai vendim i Gjykatës ka të bëjë veç me Kuvendin dhe Gjykatën, me asnjë aktër tjetër s'ka të bëjë. Madje as me kryetarin e Komunës nuk ka të bëjë. E as me Vetëvendosjen hiç se hiç, as me radiot lokale hiç se hiç, as me shoqërinë civile hiç se hiç. Atë vendime e ka marrë ky Kuvend. Kuvendi e ka marrë atë vendim unanimisht.

z. Esta Raci: Absolutisht pajtohem me ty kryesues por në proces e sipër ka mundësi që është bërë shkelje nga ekzekutivi.

Z.Arben Limanaj: Përshëndetje të gjithëve, edhe ne si grup, pajtohem që nëse drejtoria përkatëse ka mundësi sqarimi në lidhje me çështjen që u shtrua mbi fabrikën e Çimentos, nëse drejtori i drejtorisë ka mundësi sqarimi sot, te pyetje përgjigje. meqenëse se kemi miratuara rendin e ditës, unë kërkoj që për seancën e radhës së të marrim një raport nga Drejtoria e Arsimit mbi fillimin e vitit të ri shkollor dhe përgatitjet që janë bërë. Ne të gjithë jemi dëshmitarë të vështirësive që u krijuan me tekstet mësimore nga vendimi i Ministrisë së Arsimit . Kërkojmë që të na sqaron Drejtoria e Arsimit, qoftë formë të raportit, qoftë formë të interpelancës, seancën e radhës, sepse shkollat dhe arsimtarët s'janë pajisë me ditarë të punës akoma.

Kryesuesi I vuri në votim tre pika shtesë dhe me shumicë votash u miratuan. Më pastaj e vuri në votim edhe rendin e ditës me tri propozimet e shtuara dhe me 26 vota për, asnjë kundër dhe asnjë abstenim U miratua.

Pika E 1 E Rendit të Ditës: Arsyetimi I mungesave

Përveç znj. Blerta Gashi e cila do të bashkohet së shpejti në mbledhje , gjithë anëtarët e tjerë janë prezent.

Pika 2 e Rendit të Ditës: Shqyrtimi dhe aprovimi I procesverbalit nga mbledhja e kaluar.

Me 26 vota për asnjë kundër dhe asnjë abstenim U MIRATUA.

Pika 3 e Rendit të Ditës: Rekomandimet e KPF-së.

Me 26 vota për , asnjë kundër dhe asnjë abstenim u Miratuan

Pika 4 e Rendit të Ditës: Shqyrtimi i raportit të procesit të konsultimeve publike për draft-buxhetin e Komunës së Klinës për vitin dy mijë e njëzet e katër.

Kryesuesi tha se Ju e keni një raport me organizimet që janë duke i bërë në kuptim të ndërtimit të buxhetit për vitin dy mijë e njëzet e katër, me të gjitha fshatrat, mjediset, shoqëritë civile, kategori të ndryshme, madje të fundit deri kemi mbajtur edhe ne një Komitet për Politikë e Financa jashtë rendit të jashtëzakonshëm për me plotësuar edhe kriterin e fundit rreth i raportit që ju sot e keni përpara. Ne kemi thënë edhe nëpër debate, kemi thënë edhe nëpër takime edhe nëpër mbledhjet tona të rregullta që derisa votohet, mund të diskutohet, mund të debatohet, mund të propozohet gjithçka. Besoj se pjesa dërrmuese, pjesa kryesore e këtij draft buxheti është i ndërtuar nga këto mbledhje e takime me gjithë vlerësimet që i ka marrë prej përfaqësuesve të DEMOS që prej minutave të parë e ka përcjellë rrjedhjen deri në fund,

z. Enver Berisha, drejtor I FEZH: Përshëndetje të gjithëve. Realisht, ashtu siç e parasheh Ligji për Buxhetin dhe Ligji për Financat Publike, ne që nga gjysma e qershorit kemi bërë agjendën tonë për prezantimin e kornizë afatmesme buxhetore, ku përfshihen të gjitha bashkësitë lokale fshatrat veç e veç, dhe ku është debatuar korniza e afatmesme buxhetore për vitin dymijë e njëzet e katër, njëzet e pesë, njëzet e gjashtë, dhe realisht është për t'u vlerësuar edhe prezenca e njerëzve që kanë marrë pjesë në këto debate, por veçmas është për me u vlerësuar kontributi i tyre që kanë dhënë me propozimet e tyre konkrete nëpër të gjitha takimet ku ne i kemi mbajtur. Përmes takimeve nëpër lokalitete që i kemi bërë, ne i kemi thirrur nëpër dëgjime buxhetore të gjitha kategoritë, këtu përfshihen bizneset, OJQ, rinia, gra etj. Domethënë është shfrytëzuar tamam ajo bazë ligjore dhe transparencë që draft buxheti të bëhet në bazë të kërkesave të qytetarëve të komunës sonë.

Pika 5 e Rendi të Ditës: Shqyrtimit dhe miratimi i draft-buxhetit të komunës së Klinës për vitin dy mijë e njëzet e katër.

z. Enver Berisha, drejtor I FEZH: I mora dy draftet, sepse sot ju ka ardhë drafti i fundit, e para tij e keni pas edhe një draft tjetër dhe për kudo që keni dilema dhe që kemi obligime me i shfaq ndryshimet që janë bërë, ne do të jemi këtu me i prezantuar, por ndryshimet kryesisht janë mjaft domethënë simbolike. Janë ndryshime në emërtime, jo ndryshimet që kanë ndodhë në projekte dhe në vlera, përjashtoj në paga që është një lëvizje shumë e vogël, është me pesëdhjetë euro nëpër drejtori, ose njëqind euro më së shumti. Projektbuxheti për vitin dy mijë e njëzet e katër është planifikuar të jetë 14 milion e 648 mijë e 717 euro. Për vitin 2025 është planifikuar të jetë 15 milion e 405 mijë e 948 euro. Ndërsa planifikimi për vitin 2026, 16 milion e 163 mijë euro, 0.56 euro. Domethënë, këto janë ë parametrat buxhetorë, të cilat caktohen edhe nga niveli qendror. Ndërsa te projektet që ju i keni para vetes për dy mijë e njëzet e katër, ndryshimet janë në emërtime.

Hapet Debat pas prezantimit të drejtorit të financave

z. Zafer Gashi: Ne i kemi përcjell edhe herëve të tjera drafte të tilla të ardhura ndër vite. Edhe ky draft e ka atë kornizë të planifikimeve që ekzekutivi e ka bërë për vitet 2024-2026. Unë dua që ta prezantoj një raport të GAPIT ku mund të themi se ne mund të projektojmë planifikime por punët duhet të jenë në afat dhe cilësore. GAP raporton se nga 63 premtimet e kryetarit të komunës janë plotësuar vetëm 7 premtime. Nëse i shohim performancat sipas drejtorive, arsimit i ka pas 13 premtime vetëm 2 janë plotësuar, Bujqësia zero, kultura zero etj. Kjo do të thotë se deri tash ka

plotësuar vetëm 11.01% të premtimeve dhe deri në afatin e parashikuar nuk do të mund të I përmbush kurrsesi.

Zoti Gashi në vazhdim foli për projektet infrastrukturore në detaje të planifikuara në këtë draft buxhet, kishte vërejtje të tij në lidhje me shumën e ndarë për disa fshatra që sipas tij ishte shumë e vogël. Po ashtu ai u ndal edhe tek uji I pijshëm ku tha se do të ndahen disa mjete por nuk ka garanci se do të kemi ujë të pijshëm. Duhet të ketë kujdes që të përmbushet premtimi I dhënë ndër vite për ujin e pijshëm , tha z. Zafer Gashi.

“Ndarja e buxhetit për vetura , dy vite nga 35 mijë euro , mendoj që kjo ndarje duhet të bëhet më mirë nuk është bërë në mënyrën e drejtë” e përfundoi fjalën e tij z. Gashi.

z. Valmir Bacaj: Këtij draft buxheti I ka paraprij konsultimi me qytetarët, fermerët , shoqëria civile dhe janë përfshi shumë projekte të rëndësishme për qytetarët e Klinës. Organizata prestigjioze DEMOS e ka vlerësuar shumë mirë këtë Projekt buxhet dhe ecurinë deri në përpilimin e tij. Sa I përket raportit të institutit GAP, për hirë të korrektësisë kemi 63 premtime, 7 janë të përfunduara, 43 janë në proces. Nëse e kthejmë në % 63% të premtimeve janë në proces dhe këto premtime do të realizohen gjithsesi sepse janë bërë për një mandat 4 vjeçar dhe jo dy vjet sa jemi deri tani. Janë disa premtime ku kërkohet investim ndërkombëtar dhe askush nuk vjen për të investuar derisa kryeministri ynë vazhdimisht përmend luftën, pra, është zor të mbahen këto premtime.

z. Bacaj në vazhdim foli edhe për rangimin në listën e performancës ku komuna e Klinës është në mesin e 10 komunave me transparencë më të mirën.

z. Zafer Gashi: Është shumë e vërtetë që disa premtime janë në proces por unë u ndala vetëm tek ato që janë të përfunduara.

z. Kushtrim Haliti: Përshëndetje të gjithëve. Në të shumtën e rasteve edhe buxheti është I njëjtë sikurse herëve të kaluara. Për fshatin Jelloc, JAshanice dhe Pogragjë, projektet nuk janë të definuara. JAshanica I ka 7 fshatra, asnjë fshat nuk ka ndriçim, rruga në Gjurgjevik të madh një shi kur bien ata e kanë të pamundur që të kalojnë. Një rrugë e keni shtruar atje për dy familje vetëm sepse ata janë votues të Aleancës. Rrugën që keni shtruar bashkë me FSK nëse nuk intervenohet këtë vit do të bëhet e pakalueshme.

z. Haliti foli për rrugët e tjera që janë në gjendje shumë të keqe por që nuk janë definuar në këtë projekt buxhet dhe nuk dihet nëse janë planifikuar të ndërtohen. Gjithnjë duke ju referuar BL JAshanicë.

z. Tunë Dedaj: Përshëndetje të gjithëve. Dua ta falënderoj shumë për këtë projekt buxhet të paraparë. Është një buxhet I shpërndarë nëpër të gjitha lagjet dhe fshatrat e komunës së Klinës e në veçanti më vjen mirë për planifikimin e trotuarit Klinë-Krushevë e vogël- Zllakuqan, Faleminderit po ashtu për planifikimin e ndërtimit të kanalit të ujitjes në fshatrat Budisalc, Jagodë, Radulloç, Poterq, Dollovë sepse me këto kanale ujitjes zhvillohet shumë prodhimtaria e bujqësisë.

z. Esat Raci: Na ka ardhë draft buxheti për vitin 2024, e kemi lexuar e analizuar. Me vëmendje të shtuar I kemi shikuar projektet kapitale; cilat projekte planifikohen te realizohen, ku do te realizohen dhe sa do te kushtojnë.

Të gjitha këto projekte të planifikuara janë të nevojshme dhe nëse realizohen sipas kritereve do të ngritin mirëqenien e qytetarëve gjithsesi, por se kriteret shkelen dhe punët bëhen shkel e shko është e njohur tashmë, jemi dëshmitarë të gjithë veç kush ka ngarkesa politike dhe nuk donë me e pranuar. Kur shkelen kriteret dhe projekti realizohet për të dështuar pas 3 muajve ajo është abuzim me parat e taksapaguesve. Abuzime të tilla ka plot, s'po dua me I përmend cili projekt e ku është punuar keq, atë jua thonë qytetarët çdo ditë dhe ju I dini shumë mirë.

Kërkojmë që të mos I justifikoni dështimet e projekteve, mos I qitni hi syve qytetarëve sepse veç vetën tuaj e mashtroni. Qytetari I sheh dhe I prek çdo ditë. Kërkojmë që një herë e përgjithmonë të kërkohet dhe të mos I bëhet asnjë pagesë punëkryersit pa u pranuar puna e kryer nga komisioni profesional. Kërkojmë nga komisioni I pranimit të jetë korrekt dhe të respektoj ligjin dhe kualitetin e punëve. Kur jemi tek projektet, respektoni rekomandimet e auditorit dhe përmirësohuni.

Grupi Kuvendar I PDK-së, këtu e 6 vjet rresht për çdo draft buxhet ka propozuar projekte të caktuara por asnjëherë nuk kemi gjetur gatishmërinë tek ekzekutivi që të I përfshij ato projekte në buxhetim. Nuk kanë qenë asnjëherë projekte të PDK-së, as për PDK-n por për qytetarë të Komunës të cilën ju e drejtoni. Prandaj kësaj radhe PDK nuk do të propozoj asnjë projekt që të futet në këtë buxhet të planifikuar, por vota e grupit kuvendar të PDK-së do të jetë pro këtij buxheti. Jo Pro ekzekutivit por pro qytetarëve të Klinës pavarësisht nga përkatësia politike, racore e gjinore. Pra, për hatër të qytetarëve të Klinës ne do të votojmë PËR.

Ka shumë projekte të nevojshme që kanë ngelur pa u përfshi në këtë buxhet, ka ngjyrë të theksuar politike kjo ndarje e buxhetit, le të mbetet në ndërgjegjen tuaj duke ua kujtuar se edhe votuesit e PDK-së janë qytetarë të Klinës dhe taksapagues.

z. Arben Limanaj: Përfshirja e projekteve nëpër fshatra dhe lokalitete është relativisht e mirë por ajo që më bënë përshtypje që sa kohë që jam asamblist , propozimet e vogla që nuk kanë shuma të mëdha edhe neglizhohen vazhdimisht pavarësisht që grupi ynë kuvendar asnjë herë nuk ka dështuar në mbështetje të projekteve dhe buxhetit por dy projektet e vogla që ne I kemi propozuar nuk kanë gjetur mbështetje. Është propozimi për sheshin "Ibrahim Rugova" dhe propozimi për një objekt që I takon historisë dhe trashëgimisë kulturore e historike, Shtëpia e kuvendeve në Bokshiq, po e ri përsëris, nuk është objekt që I takon një subjekti politik pasi që këtu janë mbajtur me dhjetëra aktivitete të forumeve të ndryshme. Për këtë vit ka qenë si projekt I llogaritur por nuk ka asnjë procedurë të nisur dhe as projeksione për vitin e ardhshëm që të realizohet. Ajo që më irritoj më së shumti , dje isha në fshatin që përfaqësoi dhe të vetmes familje që e përkrahë pushtetin e tanishëm vetëm asaj I kishin dërguar asfaltin deri te shtëpia ndërsa të tjerëve jo. Janë lënë të gjitha rrugicat e tjera në lagje dhe I shtrohet vetëm asaj familje, Ky është një nënçmim I vazhdueshëm që po an bëhet si asamblistë.

Znj. Valmira Krasniqi: Dëshiroj të pyes për një rrugë afër Lumit "Klina", e shtruar me zhavorr por që është dëmtuar prap. Nuk ka ndonjë emër lagjja, mungon edhe emir I rrugës s'po mundem me jua përshkruar saktë ku është. Aty mungon edhe ndriçimi edhe infrastruktura.

z. Azdren Ramadani: Përshtetja. Pasi jemi tek buxheti dëshiroj që të flas pak për shumën e ndarë 90 mijë euro për gjelbërim. Kërkoj që ajo zonë e qytetit të gjelbërohet nga sheshi " Nënë Tereza" deri tek QKMF, te dekorohet me drunjë gjelbërues pasi që vetëm ajo pjesa ka mbetur e tillë.

Znj. Lirie Gashi: Përshëndetje të gjithëve. Dëshiroj të diji për rrugën “ Heronjtë e Kombit” në Dollc a është planifikuar që të ndërtohet. Asaj rruge I mungon kanalizimi, ndriçimi, s`ka trotuar.

z. Enver Gashi: Përshëndetje. Dua të ndalem tek projektet me prioritet dhe mendoj që këto projekte janë të shpërndara mirë dhe në ngritje të mirëqenies qytetare. Duke marr për bazë nevojat e shumta te qytetarëve dua të ndalem tek bashkësia më e madhe që është Sferka, projektet infrastrukturore të shtohet vlere sepse kërkesat e qytetarëve janë të mëdha.

Znj. Besiana Gashi: Të nderuar të pranishëm. Në kuadër të këtyre projekteve kam një kërkesë që të përfshihet edhe fshati Çabiq , pjesa ku nuk ka ndriçim publik.

z. Ndrec Zefaj: Përshëndetje të gjithëve. E kam lexuar dhe analizuar buxhetin për vitin 2024. Dëshiroj te ndalem tek ndërtimi I infrastrukturës mbi dhe nën tokësore në fshatrat Ranoc dhe LEskoc, ndarja buxhetore për këtë rrugë është e vogël dhe nevoja shumë me e madhe pasi që mendoj se kjo rrugë përveç tjerash duhet të shtrohet edhe me një shtresë asfalti.

Z. Zenun Elezaj, kryetar I Komunës: Përshëndetje të gjithëve. Do ët mundohem të përgjigjem në të gjitha shqetësimet e anëtarëve në lidhje me projekt buxhetin. Për ujin e pijshëm këtë vit jemi në tentativë, është hera e tretë që e shpallim tenderin, janë nda 850 mijë euro për ndërtimin e fundërruesit që do ta furnizoj fabrikën ekzistuese e fabrikës duhet të I riparohen filtrat. Vlerat e projekteve që u përmenden , mendoj që me investimet e këtij viti do të përafrohen të gjitha nevojat e qytetarëve për asfaltime dhe kanalizime. Kemi paraparë edhe buxhet shtesë për të ndërtuar rrugica të vogla. Ne kemi përfshi rrugët kryesore duke I emërtuar dhe kemi future edhe segmentet e atyre rrugëve në atë emërtim. Problemi është se rrugët nuk janë pronë komunale dhe po kërkoj nga qytetarët që banorët të sjellin kërkesën që rruga të mos jetë private por komunale. Për vitin e ardhshëm të gjitha këto rrugë janë future nën një emërtim të përgjithshëm. Tani për tani Dresniku është në një situatë jashtëzakonisht të rëndë sa I përket infrastrukturës rrugore por që kanalizimi është një proces të mirë por rrugicat mbesin sfidë edhe për vitin e ardhshëm. Qytetarët kur të bëjnë kërkesa për asfaltime të rrugicave të sjellin edhe certifikatën e pronësisë se është në pronësi të komunës sepse po kemi problem. Jashanica është përfshirë në këtë buxhet që të kompletohet me asfaltime të rrugicave edhe Kërrnica po ashtu. Sheshi “ Ibrahim Rugova” është në kontratë për këtë vit por kemi një shqetësim sepse rrethi është afër hekurudhës dhe nuk kemi mundur të marrim pëlqim për ndërtim të tij. Për shtëpinë në Bokshiq kemi bërë një gabim sepse I kemi emërtuar objekte sportive, këtë vit do ta rregullojmë dhe nuk do të kemi asnjë pengesë që ta rinovojmë atë shtëpi. Tani kemi filluar që rrugët kryesore të ju shtohet edhe shtresa e dytë e asfaltit sepse vetëm një shtresë nuk garanton qëndrueshmëri. Edhe në Resnik, Sferkë, Ranoc e Leskoc, Jelloc etj. kemi planifikuar buxhet për vitin e ardhshëm që të intervenohet në rrugët kryesore. Gjithsesi së bashku edhe me ju do të ju përgjigjemi të gjitha kërkesave të qytetarëve.

z. Zafer Gashi: Nuk po e shoh askund premtimin tënd të dhënë për ndërtimin e një Çerdheje në lagjen “ Dukagjini”. Tani po e shoh që është planifikuar ndërtimi I një Çerdheje afër shkollës “ Motrat Qiriazit”. Për cilën Çerdhe është fjala a po flitet për të njëjtën. Rruga Volljak- Sferkë po thuhet që është e përfunduar por vetëm fillimi është I përfunduar.

z. Zenun Elezaj, Kryetar: Për Çerdhe është e vërtetë që në lagjen “Dukagjini” nuk kemi lokacion. Ka qenë vendimi I ish kryeministrit Haradinaj që na pat dhënë mundësinë e bartjes së pronësisë por më pastaj qeveria tjetër e ka tërheq atë vendim dhe ne jemi detyruar që Çerdhen ta planifikojmë për tek

shkolla " Motrat Qirazi". Ne kemi buxhet edhe tek mjetet e bartura por kemi aplikuar me tre projekte, Një projekt është ato dy degët e rrugës së Sferkës që kanë ngelur pa rregulluar. Kemi aplikuar edhe me projektin për hyrje të qytetit për ndërtim të trotuarit dhe besoj që këto dy projekte do të mbështeten nga Ministria e zhvillimit rajonal.

z. Ndrec Zefaj: Për ujin e pijshëm që planifikohet ndërtimi i liqenit akumulues, ka qenë një ide e vjetër për fshatrat që janë në kufi me komunën e Istogut që të marrin ujin nga kjo Komunë, a ka lëvizje për aktualizimin e kësaj ideje?

z. Zenun Elezaj, kryetar: Kryeministri Kurti ka themeluar një komision ndërministror dhe ata kanë bërë një raport dhe kanë rekomanduar që të merret uji nga Istogu, Bordi i Hidrodrinit në Pejë janë duke punuar në këtë drejtim. Po ashtu raporti i këtij komisioni ka rekomanduar edhe ndërtimin e liqenit akumulues-fundërruesit, Të forcohen argjinaturat e lumit dhe të ndërtohet një ambient rekreatorë përreth lumit. Nuk është në kompetencë tonën por kemi përkrahje të plotë të bordit të Hidrodrinit dhe presim që të realizohet kërkesa e jonë që uji të merret nga Istogu në 100l/s për fshatrat që i përmende. 100l/s behet fjalë për sezonin e dimrit ndërsa për sezonin e verës parashikohet që të merret më pak ujë por mendoj që do të na mjaftojnë kur e kemi parasysh që shumë shpejt do të finalizohet edhe projekti për furnizim për fshatrat verilindore.

Me 23 vota për, 3 abstenim , asnjë kundër u Miratua

Pika 6 e Rendit të Ditës: Shqyrtimi dhe miratimi për shtim të buxhetit dhe krijimin e kodit të ri.

z. Enver Berisha, drejtor i FEZH: Kërkesa e parë , buxheti që është paraparë për pagesën e ndërtimit të sheshit në qytet, ministria nuk e ka pranuar me kodin e vjetër dhe ka kërkuar që të bëhet me kod të ri prandaj e kemi sjellë prap në Kuvend këtë pagesë. Kërkesa është për shtim buxheti për sera, pagesën e serave që është bashkëfinancim. Ndërsa në fund është një rialokim i mjeteve të parapara për rrugën Volljak- Sferkë.

Me 25 vota për, asnjë kundër asnjë abstenim U MIRATUA.

Pika 7 e Rendit të Ditës: Shqyrtimi dhe miratimi i vendimit të DKA për zgjedhjen e drejtorëve dhe zëvendës drejtorëve për institucionet arsimore.

Kryesuesi theksoi se janë dy propozime të ardhura nga DKA, nuk kemi të drejt të propozojmë por duhet vetëm të votojmë për ose kundër.

z. Qemajl Sejdiu, drejtor i DKA: Përshëndetje të gjithëve . Drejtorja e arsimit duke u bazuar në udhëzimin 151/2020 propozojmë komisionin : Astrit Muhaxherin Dhe Lorenc Culajn, kërkoj që të votohet ky komision.

z. Arben Limanaj: Ne këtë komision e kemi pasur edhe më herët dhe unë personalisht nuk e kam votuar jo se dyshoj në aftësitë e tyre profesionale por sepse vazhdimisht në këto përzgjedhje ka ndikim ekzekutivi dhe them se asnjëherë komuna e Klinës nuk ka pasur drejtor më të dobët në mbi 70% të tyre.

z. Zafer Gashi: Është e vërtetë që edhe herën e kaluar u pat shtyrë votimi pastaj u patën marr vesh dhe u pat votuar. Si është ë mundur i njëjti komision me të njëjtin përbërje të intervistoj një kandidat që në një shkollë del i vlerësuar 60% ndërsa për një shkollë tjetër i njëjti kandidatë del i

vlerësuar 84%? Secili kandidat ka konkurruar në më shumë se në një vend. Ka pasur edhe konflikt interesi sepse njëri nga anëtarët e këtij komisioni ka zgjedhur eprorin e vet. Kjo përzgjedhje e drejtorëve është përbushje e premtimeve elektorale të kryetarit. Një përzgjedhje e tillë nuk shkon në të mirë të performancës së shkollave në komunë. Zgjidhet drejtor një kandidat që pas një apo dy muajve del në pension, Ne do të votojmë kundër këtij propozimi.

z. Kushtrim Haliti: Ne e dimë se në çfarë niveli I kemi shkollat por nuk është mirë që të I lejmë shkollat pa drejtorë prandaj ne si grup e përkrahim këtë komision.

z. Qemajl Sejdiu, drejtor I DKA: Sa I përket përzgjedhjes së drejtorëve mund të them se s`ka pas asnjëherë përzgjedhje më transparente dhe të mirë, Unë ju uroj atyre që janë zgjedhur.

z. Valmir Bacaj: Kemi pranuar propozimin për komisionin për zgjedhjen e drejtorëve dhe zëvendës drejtorëve, Mendojmë që janë në nivelin e duhur dhe të kërkuar profesionalisht prandaj jemi pro këtij komisioni.

Me 17 vota për, 3 kundër dhe 2 abstenime u MIRATUA.

Pika 8 e Rendit të ditës: Rishqyrtimi I vendimit nr. 06 2208/23 dt. 5. 7. 2023

Kryesuesi tha se duhet të rregullohet baza ligjore e strategjisë për komunikim dhe marrëdhënie me publikun. Ai tha qe ne si kuvend e ndryshojmë vendimin duke u mbështetur në infrastrukturën e re ligjore.

Me 20 vota për, asnjë kundër dhe asnjë abstenim u Miratua rishqyrtimi

Pika 9 e Rendit të Ditës: Kërkesa e kryetarit t6ë komunës për autorizim për marrëveshje me komunën e Skenderajt për asfaltimin e një rruge të përbashkët.

Me 20 vota për , asnjë kundër dhe asnjë abstenim U MIRATUA

Kërkesa e dytë është që lokalet në pronësi të komunës që janë në shkresë të jepen në shfrytëzim afatshkurtër dhe pastaj të kalohet në formimin e komisionit

z. Zenun Elezaj, kryetar: Ne jemi munduar që të gjitha lokalet që nuk kanë paqartësi ligjore , këto lokale janë tek NOJTRA 20 dhe 3 lokale janë tek shkolla "Ismet Raci". Sot po kërkohet me një procedurë dhe ky proces duhet të monitorohet komplet nga Kuvendi. Këto lokale janë në gjendje të mjerueshme dhe me sado vlerë ti kthejmë në treg.

z. Zafer Gashi tha se është e arsyeshme që të epen këto lokale dhe të nisin bizneset por që në të ardhmen të shikohet mundësia edhe për lokale të tjera dhe të shihet padrejtësia që behët nga persona që shfrytëzojnë lokalet njerëz që nuk kanë kontrata me komunë. Ndërsa kryetari theksoi se do të vazhdojnë me qartësimin e situatës së të gjitha lokaleve. Për dhënien në shfrytëzim të këtyre lokaleve me qira ishte dakord edhe z., Valmir Bacaj dhe grupi I tij kuvendar.

Me 25 për, asnjë kundër dhe asnjë abstenim U MIRATUA

Përzgjedhja e komisionit për dhënien në shfrytëzim të pronës së paluajtshme u bë sipas rregullores të cilën e citoi kryesuesi I Kuvendit z. Gashi.

U propozuan: Drilon Morina, Rexhep Gashi, Kushtrim Haliti, Blerina Gashi, Shoqëria civile

Me 25 vota për, asnjë kundër dhe asnjë abstenim u MIRATUA.

Komisioni për ankesa u propozua: Valmira Krasniqi, Luigj Ademi, Kreshnik Raci, Haki Bajraktari, shoqëria civile.

Me 25 vota për , asnjë kundër dhe asnjë abstenim U MIRATUA

Pika 10 e Rendit të Ditës: Raportimi I drejtorit për ecurinë e fabrikës së çimentos

z. Enver Berisha, drejtor i Urbanizimit: Përshëndetje. Sa I përket kësaj pike neve na ka ardhur një shkresë zyrtare nga LVV të cilës do ti referohem por edhe debateve dhe protestave që I kanë bërë të ashtuquajturit grupi kundër fabrikës. Lidhur me shkresën e lartcekur unë nuk kam ndonjë koment pasi që vendimi është marrë nga gjykata themelore në Prishtinë dhe ka të bëjë vetëm me hedhjen poshtë të paditëses, qeveria e Kosovës- MAPL kundër të paditurës, Komuna e Klinës. Ky aktvendim nuk ka të bëjë fare me drejtorinë e Urbanizmit dhe nuk është lëshuar në trajtimin e çështjes.

Drejtori foli në vazhdim në lidhje edhe me aktivitetet e grupit kundër ndërtimit të fabrikës. Drejtori tha se I njoftoj qytetarët se ministria e mjedisit edhe pas anulimit të lejes ka lëshuar leje të ndryshme, leje mjedisore në tre raste për 234 hektar për të njëjtin operator Wallnigford.

z. Zafer Gashi tha se shihet që çdo gjë është bërë jo mirë, ardhja në këtë situatë nuk është e mirë fare. Kemi kërkuar një seancë të jashtëzakonshme që do të merrnin pjesë edhe qytetarët, ju lutem mos I ofendoni qytetarët duke I quajtur Të Ashtuquajtur grupin e tyre sepse është një numër I madh I qytetarëve që kanë nënshkruar peticion. Vendimin e marrur është dashur që ta postoni në web faqe të Komunës , është një dokument I mirë I ardhur dhe është meritë e këtij Kuvendi. Komisioni hetimor nuk arriti asnjëherë që të jap raport para kuvendit dhe unë I bashkohem thirrjes së kryesuesit që të I epet një epilog por unë gjithashtu kërkoj të dijë se çka do të bëhet pas këtij vendimi.

z. Gashi tha se ajo çka sjell ky dokument na bënë neve me mëndu se çka pritet në të ardhmen. Ai pronar I asaj kompanie me siguri që do të kërkoj dëmshpërblim tani pas vendimit të gjykatës themelore. Drejtorja dhe organet e tjera që kanë dhënë leje gjatë kohës sa lënda ka qenë në gjykatë janë ngutur. “ Ne kërkojmë që të konsultoheni me zyrën ligjore dhe ti marrim hapat pararendës që mos të dëmtohet komuna. Kërkojmë gjithashtu që pas këtij vendimi komuna të bëjë tërheqjen e lejeve të dhëna” tha në fund z. Zafer Gashi.

z. Fadil Gashi: Po flas si anëtar I Kuvendit. Sa I përket guratorëve që është pjesë e vendimit të nxjerrë në Kuvend. Vendimi është kthyer në pikën zero tanimë. Në një seancë të kaluar e kemi nxjerr një vendim dhe një komision hetimor I cili komision më ka thirr edhe mua dhe ak marrë deklaratën time. Ku është ajo deklaratë e imja., Është e pasinqertë që nuk implementohet puna e atij komisioni por del me deklarata kryetari I atij komisioni nëpër media e nuk vjen këtu ku është zgjedhur që të raportoj. Nuk është e sinqertë që të del dikush nëpër media nga ai grup dhe të fyej krejt kuvendin dhe krejt punën e kuvendit ta tjetërsoj e ta bëjë të veten. Vendimet e gjykatave nuk interpretohen, Lejes së ndërtimit ju ka paraprij disa pëlqime që I ka dhënë ministria. Këto pëlqime që z, Zafer Gashi mi ka pas kërkuar ja kam dhënë por nuk I ka bërë publike. Tani unë as sot nuk e diji a kemi bërë mirë apo keq që e kemi ndaluar ndërtimin e fabrikës, sepse nuk besoi që dikush është kundër zhvillimit

ekonomik por ky kuvend e ka marrë një vendim. Lehtë është me dalë nëpër media e me folë por ky ekzekutivi ynë , zyra e jonë ligjore 36 prova I ka dërguar në gjykatë, prandaj është marrë ai vendim nga gjykata themelore e kurrresi as shkaku I protestave e as deklaratave të personave nëpër media. Sidoqoftë kryetari I komisionit duhet të vij e të jap llogari këtu në kuvend, kuvend ku është zgjedhur e jo nëpër media, veprimi I tij është I papërgjegjshëm. Mos raportimi I tij në kuvend mund të pasoj kallxim penal për të sepse ka marr deklaratat tona dhe nuk e diji ku I ka dërguar. Sa I përket vendimit dhe fabrikës ne akoma nuk e dimë epilogun.

z. Esat Raci: Kam qenë njeri nga ata që vazhdimisht kam kërkuar që të vijë komisioni dhe të raportoj dhe insistoj përsëri. Le të dorëzohet materiali. Po ashtu e pash të pa arsyeshme drejtorin e urbanizimit që të I quaj të ashtuquajtur ata që protestojnë, kanë të drejt të protestojnë qytetarët. Tani një vendim të gjykatës themelore është, çka do të bëhet me tutje. Vendimi I Kuvendit mbetet në fuqi sipas vendimit të themelores. Çka do të bëhet më tej.

z. Fadil Gashi tha, se aty janë një zingjir dokumentesh e lejesh të dhëna. Nga komuna ka dalë vetëm leja e parë, dokumenti I parë , gjitha të tjerat I ka dhënë ministria përkatëse dhe KPM. Kemi hyrë në transaksione sepse për leje operatori ekonomik ka paguar. Të gjitha këto duhet të zgjidhen përmes gjykatës. Mund të bëjmë gabime kur të bëjmë deklarata publike prandaj duhet të jemi të kujdesshëm.

z. Zenun Elezaj, kryetar: Pas vendimit të gjykatës themelore , ne jemi të obliguar që të përcjellim fuqinë e vendimit. Presim konfirmimin e zyrës ligjore se a ka ankesa. Më pastaj ne jemi të obliguar që të marrim veprime që përcaktohen nga ky vendim. Fati I madh është se komuna e Klinës e ka dhënë vetëm lejen e ndërtimit por asnjë investim nuk është bërë në ndërtim. Ne kemi një vendim që e ka pezulluar ndërtimin e fabrikës dhe ju kam thënë edhe qytetarëve se nuk është obligim I tyre me e ndalu ndërtimin fabrikës por imi si kryetar dhe s` ka asnjë diskutim se nuk mund të ndërtohet derisa ka pezullim. Që të jemi pak të kujdesshëm, fabrika e cementit nuk është në rrugë që mund të ndërtohet e komuna e Klinës edhe mund të detyrohet që ta kthej atë taksë që e ka marr nga OE por tjetër gjë nuk besoj sepse nuk është investuar asgjë në ndërtim. Sidoqoftë kur të vije forma e prerë e vendimit do të këshillohem me zyrën ligjore dhe do ta tërheqim lejen e ndërtimit. Në ditët në vijim do ta marrim vesh se a ka bërë ankesë MAPL. Jam I hapur për çdo koordinim.

z. Enver Berisha, drejtor I Urbanizimit: Asnjëherë nuk kam menduar dhe as nuk mendoj që të fyej qytetarët që protestojnë , i jam referuar vetëm atyre tre katër vetave që kanë dalur para mediave. Kam qenë transparent gjithmonë dhe do të jem.

z. Zafer Gashi kishte vërejtje tek drejtori I urbanizimit për deklaratat e tij për aktivitete e LVV sepse ato janë aktivitete politike të kësaj lëvizje. “ Neve na ka befasuar aq mirë si komision kur e kemi intervistuar z. Fadil Gashi I cili shumë qartë na ka thënë në atë kohë- mos qofsha në lëkuren e atij drejtori” tha në fund z, Gashi.

z. Valmir Bacaj tha se ka qenë insistues që vendimi I gjykatës të sqarohet e mos të I epet hapësirë për keqinterpretim nga individ. Deri tani dihet kush ka qenë fitues- Kuvendi Komunal, ekzekutivi dhe qytetarët. Se çka do të behët me të gjitha ato shkresa të ministrisë që na kanë shantazhuar duke kërcënuar se rrezikojmë për të shkuar në arbitrazh dhe lejeve që ministria I ka dhënë. Sa I përket Komisionit për hetim, ka qenë dakordim I shumicës që kryetar të zgjidhet një nga shoqëria civile, Të gjetura nuk ka pasur, edhe pse LVV në Klinë ka keq informuar qytetarët vazhdimisht.

z. Zafer Gashi tha se është I gatshëm që Valmir Bacajn ta zgjedhim për të raportuar për hetimin e komisionit, të nxjerrët një epilog dhe të mbyllet puna e atij komisioni, nuk është qëllimi im që të përdoret raporti edhe pse unë mendoj që ka shumë të gjetura.

Në lidhje me komisionin hetimor rreth fabrikës së çimentos u diskutua edhe më gjatë sidomos rreth mandatit nga kuvendi që e ka pasur ai komision dhe që akoma nuk e kanë përfunduar përgjegjësinë e marrur. Kryesuesi thanë se ky kuvend kërkon vetëm korrektësi nga ky komision. Në këtë temë përveç Kryesuesit z. Fadil Gashi u inkuadruan edhe Ndrec Zefaj si anëtar i komisionit, Zafer Gashi, Valmir Bacaj, Tunë Dedaj, Esat Raci, Kryetari i Komunës, Zenun Elezaj etj.

Pika e 11 e Rendit të Ditës: Pyetje dhe përgjigje

z. **Esat Raci:** Kërkoj që të bëjë sqarimin në lidhje me vendimin e marrë nga ky kuvend për kërkesën për mjetet të ndara për OVL të UCK-së. Kërkoj që ai vendim të implementohet.

z. **Zenun Elezaj, kryetar:** Zgjidhja e ekzekutivit për këtë çështje ka qenë që kur të ketë thirrje publike për përkrahje aty të I mbështesim, aty mund ta rrisim përkrahjen për organizatat. Në listë të pagave nuk mund të I fusim. Mbështetja e jonë nuk do të mungon por vetëm me shpallje publike, me projekte.

z. Esat Raci morri prap fjalën duke thënë se e di që nuk ka mundësi për të hy në listën e pagave por ata kanë ofruar një model sikurse Komuna e Prishtinës. Dakordimi edhe I kuvendit edhe I ekzekutivit ka qenë por ka mbetur të gjetet forma se si ti ndahen mjetet.

z. Enver Berisha, drejtor i FEZH: Dakordimi i anëtarëve të kuvendit dhe ekzekutivit ka qenë që të bëhet me rishikim të buxhetit, E vërteta ka qenë se qeveria nuk ka leju të bëhet rishikim të buxhetit.

z. **Arben Limanaj:** Kam një pyetje për drejtorin e urbanizimit. Para disa ditëve sipas përfaqësuesit të lagjes së "Veselmehmetve" të Siqevës, ata kanë bërë një ankesë për një projekt që ka mbetur në gjysmë, kanalizimi të ujërave të zeza, Era e keqe është duke jua bërë të pamundur daljen në oborre të shtëpive.

z. **Enver Berisha, drejtor i Urbanizimit:** Po, e vërtetë ata kanë bërë një kërkesë të shkruar dhe unë jua kam kthyer të shkruar, kanë bërë kundër ankesë dhe ju kam thënë se do të jua dërgoj inxhinierët në atë lagje dhe mundësinë e parë do të intervenojmë.

z. **Zenun Elezaj, kryetar:** Buxheti është I ndarë, kontrata është e nënshkruar por nuk po lejojnë bashkëngjitjen me kanalizimin në Ujmirë. Është duke u diskutuar vetëm për kyçje në lagjen e "Millakve" në Ujmirë. Kemi problem të shumta të kësaj natyre sepse qytetarët nganjëherë nuk po lejojnë të kalon kanalizimi nëpër prona të tyre.

z. **Valmira Krasniqi:** Dëshiroj të pyes kryetarin se kur e ka ndërmend të përgjigjet në pyetjen që ja kam bërë para tre muajve.

U kërkua që të përsëritet pyetja

Znj. **Valmira Krasniqi:** A ka pronësi komuna në lagjen Arbëria.

z. Faruk Smajli, drejtor I Inspektoratit: Në bazë të të gjitha të dhënave lokacioni afër stacionit të policisë ka qenë pyetja, kjo parcelë ka qenë në emër të Milorad Mikic por në vitin 2002 kjo pronë ka kaluar në pronësi të një personi tjetër shqiptar. Disa prona të tjera të komunës janë tre parcelë ku janë ndërtuar por presim vendim të gjykatës dhe zgjidhjen e atij kontesti gjyqësor.

z. Tunë Dedaj: Kam një kërkesë të banorëve të Zajmit dhe Deiqit. Janë tre pengesa në largësi 500 metra, tre polic të shtrirë, ata kërkojnë që të hiqet një.

Znj. Lirie Gashi: Kam një kërkesë për drejtorinë e arsimit. A është gati implementimi i participimit të pagesës me 50% për bartjen e nxënësve.

z. Qemajl Sejdiu, drejtor I DKA: Po kjo është në procedurë.

Znj. Leonora Dakaj: Dua të ngrit një çështje dhe kërkesë të banorëve të fshatit Caravik për një rrugë që lidhë fshatrat e Klinës, Malishevës dhe Drenasit. Është në gjendje të keqe dhe ka nevojë riparim urgjent. Kjo rrugë i përket Ministrisë së infrastrukturës, rrugë rajonale, është ndërtuar në vitin 2006 ndërsa në vitin 2020 është riparuar por pjesa mbi 2 km asnjëherë nuk është riparuar as nuk është mirëmbajtur as nga ministria as nga komuna e Klinës. Në lidhje me këtë banorët e Caravik kërkojnë që të angazhohet me ministrinë përkatëse që kjo rrugë të rregullohet.

z. Enver Berisha, drejtor I Urbanizimit: Po është shqetësim me vend, Bashkë me kryetarin kemi qenë tek ministri i infrastrukturës dhe kemi kërkuar që të intervenohet në këtë rrugë por për këtë vit na ka thënë se s' ka buxhet.

z. Zafer Gashi: A kemi të drejtë ne si asamblistë të dimë se sa qytetarë serb marrin ndihma sociale nga QPS. Sa e dimë ne ata as nuk jetojnë këtu në Klinë por vetëm vijnë dhe nënshkruajnë kur të vije koha. Një pyetje tjetër, Kryetari ka pranuar disa herë donatorët që sjellin ndihma. Më ka bërë përshtypje një ndihmë që ka ardhur para pak kohe e që ka sjell mjete për shërbimin e gjinekologjisë. Fatkeqësisht ne nuk e kemi atë shërbim prandaj ato mjete është mirë me i dedikuar atje ku ka ashtu shërbimi sepse do të përfundojnë keq. Janë mjete që kushtojnë shumë. E fundit, kemi një kërkesë nga një qytetar, profesor për një bust të patriotit Ymer Berisha, Derik u ka shkuar përgjigja për këtë kërkesë.

z. Zenun Elezaj, kryetar: Sa i përket numrit të serbëve që marrin social nuk e kam informatën por mendoj që kur të duash mund ta marrësh nga QPS. Sa i përket donacionit në fjalë plotësisht pajtohem me ju që mos të marrim pajisje që nuk an duhen ose që janë afër afatit të skadencës, këtë do ta diskutoj me drejtorin gjithsesi. Sa i përket Bustit të patriotit Ymer Berisha, duhet të futet në planin e zhvillimit komunal sepse duhet të parashihen në PZHK, sidoqoftë vitin e ardhshëm do të rishikohet Harta Zonale dhe aty mund të përfshihet, Kam kërkuar vazhdimisht që të përfshihen vlerat që kemi.

z. Faruk Smajli, drejtor I Inspektoratit: Sa i përket pyetjes së z. Tunë Dedaj. Kemi pasur kërkesë nga qytetarët për policë të shtrirë shkak i shpejtësisë që zhvillohet në atë pjesë. Komisioni inspektues ka vendosur ashtu dhe përveç z. Tunë Dedaj asnjë ankesë nuk e kam pasur nga banorët. Sa i përket pyetjes së Zafer Gashi për lejet që tha se i lëshon inspektorati, dua të ja kujtoj se inspektorati as nuk lëshon leje pune e as nuk verifikon leje pune.


z. Tunë Dedaj: Më vjen keq por nuk kam folur në emrin tim personal. Jam përfaqësues i banorëve të Zajmit. Nëse dëshiron ti unë mund të jua sjell 200 nënshkrime.

z. Lirie Gashi: Dëshiroj të ndërlihem me donacionet që I kanë sjellë për gjinekologji, pse të dërgohen diku tjetër derisa janë 50 fshatra të komunës së Klinës që kanë nevojë për atë shërbim.

Në këtë pikë kryesuesi, pasi pa që nuk ka pyetje të tjera nga anëtarët e kuvendit, I shpalli të përfunduara punimet e seancës duke falënderuar ët gjithë për angazhim.

Procesmbajtës:

Skënder Behramaj



Kryesuesi:

Fadil Gashi

